

Allannguutissatut siunnersuut

uunga

**Uunga siunnersuut: Aatsitassat pillugit ingerlatallu tamatumunnga pingaarutillit pillugit inatsisartut inatsisaat (aatsitassanut ikummatissanullu inatsit) allanngortinneqarneranik Inatsisartut inatsisaat nr. xx, yy 2016-imeersoq**

Aappassaanneerpeqarnerani Naalakkersuisunit saqqummiunneqartoq.

§ 1-imut

1. § 1, nr. 9, imatut oqaasertalerneqassaaq:

” 9. § 36 imatut oqaasertalerneqassaaq:

” § 36. Akuersissut malillugu aatsitassarsiorluni suliaqarnerup ingerlanneqarnera pillugu atugassarititaasunik erseqqinnerusunik Naalakkersuisut annikitsumik aatsitassarsiornissamut akuersissummi aalajangersaassinnaasapput. Atugassarititaasut pisinnaatitsissummik pigisaqartup aatsitassarsiorluni ingerlatassatut pilersaarutigisai eqqarsaatigalugit aalajangersarneqassapput, ilanngullugit ingerlatassat suussusai annertussusaalu. Ingerlatassat imaluunniit pissutsit allannguuteqartut tamanna pisariaqartilerpasuk, atugassarititaasut allannguuteqartillugit Naalakkersuisut aalajangersaassinnaapput.

*Imm. 2.* Ingerlatat suut immikkut akuersissuteqarfigineqarani ingerlanneqaqqusaanersut, immikkut akuersissuteqarfigineqarluni aatsaat ingerlanneqaqqusaanersut aammalu ingerlanneqaqqusaannginnersut pillugit atugassarititaasut erseqqinnerusut Naalakkersuisut annikitsumik aatsitassarsiornissamut akuersissummi aalajangersarsinnaavaat.

*Imm. 3.* Kisermaassisussaataitanani annikitsumik aatsitassarsiornissamut akuersissut malillugu aatsitassarsiorluni ingerlatat taamaallaat sakkunik tigummiaannartakkanik, motooreqanngitsunik atuilluni suliareqqusaapput, soorlu assersuutigalugu kaataq, qussaataq, kaanngartiterut aamma sillaq, taamaattoq takuuk imm. 4.

*Imm. 4.* Kisermaassisussaataitanani annikitsumik aatsitassarsiornissamut akuersissut malillugu pisinnaatitsissummik pigisaqartoq tamanna pillugu qinnuteqaateqarpat, akuersissut malillugu aatsitassarsiorluni ingerlatat aamma sumiiffimmi aalajangersimasumi ataatsimi arlalinniluunniit sakkut tigummiaannartakkat motorillit, soorlu assersuutigalugu qillerut innaallagiartortoq, pilattuut innaallagiartortoq aamma sequtserut innaallagiartortoq, atorlugit aammalu annikitsunik qaartiterinernik atuilluni, ingerlanneqarsinnaasut, Naalakkersuisut immikkut ittumik akuersissuteqarsinnaapput. Taamatut akuersissuteqarneq pillugu aalajangersakkanik erseqqinnerusunik aammalu taakkununnga atugassarititaasunik Naalakkersuisut aalajangersaassinnaapput.

*Imm. 5.* Kisermaassisussaatailluni annikitsumik aatsitassarsiornissamut akuersissut malillugu aatsitassarsiorluni ingerlatat sakkut tigummiaannartakkat motooreqanngitsut aamma

motoorillit suliarineqarsinnaapput.

*Imm. 6.* Kisermaassisussaatailluni annikitsumik aatsitassarsiornissamut akuersissut malillugu pisinnaatitsissummik pigisaqartoq tamatumunnga qinnuteqaateqarpat, akuersissut malillugu aatsitassarsiorluni ingerlatat aamma qaartiterinerit annikitsut atorlugit ingerlanneqarsinnaasut Naalakkersuisut immikkut akuersissuteqarsinnaapput. Taamatut akuersissuteqarnej pillugu aalajangersakkanik erseqqinnerusunik aammalu taakkununnga atugassarititaasunik Naalakkersuisut aalajangersaasinnaapput.

*Imm. 7.* Aatsitassarsiorluni ingerlatanik aammalu ingerlatanik tassunga atasunik suliaqarnej, sakkunik, qamutininik motoorilinnik, sanaartukkanik ilaalu ilanngullugit, atuineq pillugu aalajangersakkanik erseqqinnerusunik aamma atugassarititaasunik Naalakkersuisut aalajangersaasinnaapput.””

**2.** § 1, nr. 12, imatut oqaasertalerneqassaaq:

”**12.** § 38, *imm. 2*, imatut oqaasertalerneqassaaq:

” *Imm. 2.* Kisermaassisussaataitanani akuersissut malillugu pisinnaatitsissummik pigisaqartoq sakkunik tigummiannartakkanik motooreqanngitsunik, soorlu assersuutigalugu kaataq, qussaataq, kaanngartiterut aamma sillaq, atuilluni taamaallaat piiianermik suliaqarniarpat, *imm. 1*-imi maleruagassat atuutissanngillat. Taamaattoqarpat pisinnaatitsissummik pigisaqartoq tamanna pillugu uppersaalluni nalunaarummik Naalakkersuisunut nassiussissaaq. Uppersaalluni nalunaarut, pisinnaatitsissummik pigisaqartup piiianermik imaluunniit ingerlatanik iliutsinillu tassunga atasunik aallartitsinissaa sioqqullugu, Naalakkersuisunit akuerineqareersimassaaq.””

## Siunnersuummut nassuiaatit

### **Nassuiaatit nalinginnaasut**

Allannguutissatut siunnersuut, Uunga siunnersuut: Aatsitassat pillugit ingerlatallu tamatumunnga pingaarutillit pillugit inatsisartut inatsisaat (aatsitassanut ikummatissanullu inatsit) allanngortinneqarnerani Inatsisartut inatsisaat nr. xx, yy 2016-imeersoq, siullermeerneqarnerani siunnersuutip kalaallisoortaani naleqqutinngitsοqartoq uparuarneqarnera tunngavigalugu saqqummiunneqarpoq. Siunnersuut siullermeerneqareernerata kingorna Aatsitassanut Ataatsimiititaliamut nassiunneqarpoq.

Aatsitassanut Ataatsimiititaliaq ulloq 13. oktober 2016 siunnersuutip aappassanneerneqarnissaanut isumaliutissiissuteqarpoq. Aatsitassanut Ataatsimiititaliap isumaliutissiissummini uparuarpaas siunnersuummi kalaallisut oqaaseq ”ikiorsiiniutit” danskisut oqaatsimut ”hjælpemidler” atorneqartoq. Aammattaaq Aatsitassanut Ataatsimiititaliap uparuarpaas Inatsisartut inatsisaanni maannakkut atuuttumi oqaaseq ”sakkut” danskisut oqaatsimut ”hjælpemidler” atorneqartoq.

Aatsitassanut Ataatsimiititaliap isumaliutissiissummini inassutigaa, siunnersuummi kalaallisut oqaatsip ”sakkut” atorneqarnissaata qulakkeernissaa siunertaralugu, allannguutissatut siunnersuummik saqqummiussisoqassasoq. Oqaaseq ”sakkut” maannakkut Inatsisartut inatsisaanni atuuttumi atorneqareerpoq.

Allannguutissatut siunnersuummi siunnersuutip kalaallisoortaani taaguusersuinermi assigiissaarinissaq qulakkeerneqarpoq. Allannguutissatut siunnersuut, siunnersuutip danskisoortaani allanngortitsinermik malitseqanngilaq. Allannguutissatut siunnersuut oqaatsitigut iluarsinissamut taamaallaat tunngassuteqarmat, allannguutissatut siunnersuut innuttaasunut, inuussutissarsiorunut imaluunniit pisortanut aningaasaqarnikkut imaluunniit allaffissornikkut sunniuteqarnernik malitseqassanngilaq.

### **Aalajangersakkanut ataasiakkaanut nassuiaatit**

#### § 1-imut

Nr. 1-imut (§ 36)

Allannguutissatut siunnersuut kalaallisoortaani allanngortitsinernik taamaallaat malitseqarpoq. Allannguutissatut siunnersuutip malitsigisaanik imm. 3-5-imi aamma 7-imi danskisut oqaatsimut ”hjælpemidler”, kalaallisut oqaaseq ”ikiorsiiniutit” oqaatsimik ”sakkut” taarserneqarpoq.

Nr. 2-imut (§ 38, imm. 2)

Allannguutissatut siunnersuut kalaallisoortaani allanngortitsinernik taamaallaat malitseqarpoq. Allannguutissatut siunnersuutip malitsigisaanik danskisut oqaatsimut ”hjælpemidler”, kalaallisut oqaaseq ”ikiorsiiniutit” oqaatsimik ”sakkut” taarserneqarpoq.